

無邊供養之具爾乃堪能供養師耶阿難當
來之世多諸比丘得是經已於師和尚起不
敬心無有正行於師和尚恒說於過阿難我
說彼等愚癡人輩極受多苦於當來世必墮
惡道阿難我向汝說我向語汝如來在世於
汝等邊已爲說訖此是正道此非正道於當
來世彼諸比丘隨行何行還生是處得是果
報是故阿難我教汝等常行恭敬阿難若有
善男子善女人能生恭敬尊重之心當得如
是勝上之法所謂愛敬諸佛世尊敬重經法

深愛敬僧當入是次佛說是經已長老阿難
等及諸大衆聞佛所說歡喜奉行

佛說善恭敬經

稱讚大乘功德經

唐三藏法師 玄奘奉 詔譯

如是我聞一時薄伽梵住法界藏諸佛所行
衆寶莊嚴大功德殿與無央數大聲聞衆大
菩薩俱及諸天人阿素洛等無量大衆前後

園遶爾時會中有一菩薩示爲女相名德嚴華承佛威神從座而起稽首作禮而白佛言何等名爲菩薩惡友新學菩薩知已遠離爾時佛告德嚴華言我觀世間無有天魔梵釋沙門婆羅門等與新學菩薩於無上菩提爲惡知識如樂聲聞獨覺乘者所以者何夫爲菩薩必爲利樂諸有情故勤求無上正等菩提樂二乘人志意下劣惟求自證般涅槃樂以是因緣新學菩薩不應與彼同住一寺同止一房同處經行同路遊適若諸菩薩已於

大乘具足多聞得不壞信我別開許與彼同居爲引發心趣菩提故若彼種類善根未熟未應爲說大乘法教令生誹謗獲罪無邊新學菩薩但應親近久學大乘多聞菩薩爲於無上正等菩提所種善根速成熟故不應親近樂二乘者所以者何彼障菩薩菩提心故彼令棄捨菩提心故彼令虧損菩提心故彼令毀犯菩薩行故菩薩寧當棄捨身命不應棄捨大菩提心發起趣求二乘作意若諸菩薩勸諸有情捨菩提心趣二乘地若諸菩薩

勸諸有情捨菩提心造諸惡業俱墮地獄受
諸劇苦菩薩寧守大菩提心造五無間受地
獄苦終不棄捨大菩提心而欲趣求預流果
證菩薩寧守大菩提心百千大劫受地獄苦
終不棄捨大菩提心而欲趣求一來果證菩
薩寧守大菩提心受傍生身或作餓鬼終不
棄捨大菩提心而欲趣求不還果證菩薩寧
守大菩提心造十惡業墮諸惡趣終不棄捨
大菩提心而欲趣求無生果證菩薩寧守大
菩提心入大火坑救諸舍識終不棄捨大菩

提心而同怯賊投涅槃界菩薩哀愍一切有
情於生死中輪轉無救初發無上菩提心時
一切天人阿素洛等皆應供養已能映奪一
切聲聞獨覺乘果已能摧伏一切魔軍諸惡
魔王皆大驚怖時德嚴華聞佛語已重請佛
言何謂魔軍惟願世尊哀愍為說佛告德嚴
華若有聞說大乘法教不生隨喜不樂聽聞
不求悟入不能信受反加輕笑毀訾凌憐離
間謗譏捶打驅擯應知此等皆是魔軍是則
名為樂非法者性鄙劣者求外道者行邪行

者壞正見者應知此等謗毀大乘當墮地獄
受諸劇苦從彼出已生餓鬼中經百千劫常
食糞穢後生人中盲聾瘡痂肢體不具其鼻
匾匱愚鈍無知形貌羸陋如是漸次罪障消
除流轉十方或遇諸佛親近供養復聞大乘
聞已或能隨喜信受因此便發大菩提心勇
猛精勤修菩薩行漸次增進乃至菩提諸佛
世尊無別作意爲有情類說五乘法由本願
力依法界身於一切時從諸毛孔任運流出
無量法光以一妙音等澍法雨於一衆會無

量有情昔來信樂聲聞乘者聞佛爲說聲聞
乘法昔來信樂獨覺乘者聞佛爲說獨覺乘
法昔來信樂無上乘者聞佛爲說無上乘法
昔來信樂種種乘者聞佛爲說種種乘法昔
來信樂人天乘者聞佛爲說人天乘法傍生
鬼等亦聞如來以隨類音而爲說法若有昔
來未聞法者彼唯見佛處衆默然曾聞大乘
而誹謗者經無量劫墮大地獄傍生餓鬼及
天人中備受苦已聞大乘法即能隨喜深生
淨信便發阿耨多羅三藐三菩提心時德嚴

華聞佛說已重請佛言何謂大乘此大乘名
爲目何義世尊告曰善哉善哉汝能樂聞大
乘功德諦聽諦聽善思念之吾當爲汝分別
解說此大乘名所目諸義此乘綜攝籠駕弘
遠無所遺漏故曰大乘此乘功德甚深微妙
過諸數量故曰大乘此乘堅固虛妄分別不
能傾動故曰大乘此乘真實窮未來際無有
斷盡故曰大乘此乘寥廓該羅法界邈無邊
際故曰大乘此乘如海吞納蘊積功德寶聚
故曰大乘此乘如山作鎮區域邪徒不擾故

曰大乘此乘如空包含一切情非情類故曰
大乘此乘如地普能生長世出世善故曰大
乘此乘如水等潤一切令無枯槁故曰大乘
此乘如火焚滅諸障令無餘習故曰大乘此
乘如風掃除一切生死雲霧故曰大乘此乘
如日開照羣品成熟一切故曰大乘此乘如
月能除熱惱破諸邪暗故曰大乘此乘尊貴
天龍八部咸所敬奉故曰大乘此乘恒爲諸
健達縛歌詠讚美故曰大乘此乘恒爲四王
梵釋禮敬尊重故曰大乘此乘恒爲諸龍神

等敬事防守故曰大乘此乘恒為一切菩薩
精勤修學故曰大乘此乘任持諸佛聖種展
轉增盛故曰大乘此乘圓滿具大威德映奪
一切故曰大乘此乘周給一切有情令無匱
乏故曰大乘此乘威力猶如藥樹救療眾病
故曰大乘此乘能害一切有情諸煩惱賊故
曰大乘此乘能轉無上法輪饒益一切故曰
大乘此乘微妙甚深祕密不可宣說故曰大
乘此乘神用紹三寶種能使不絕故曰大乘
此乘能顯世俗勝義理趣究竟故曰大乘此

乘能顯諸菩薩行無不具足故曰大乘此乘
能顯佛地功德無不備悉故曰大乘此乘利
樂一切有情盡未來際故曰大乘此乘至功
能建大義妙用無盡故曰大乘此乘幽玄下
劣意樂不能信受故曰大乘此乘平等增上
意樂方能信受故曰大乘此乘廣大下愚不
測而為輕笑故曰大乘此乘尊高上智能達
常所寶玩故曰大乘此乘超過獨覺乘等最
上無比故曰大乘佛說如是大乘名義體用
殊勝諸功德時於此三千大千世界六種震

動空中天樂百千萬類不鼓自鳴諸妙天華
繽紛亂墜無量天子無數聲聞聞此法音觀
斯瑞應皆發阿耨多羅三藐三菩提心百千
俱胝新學菩薩同時證得無生法忍爾時阿
難即從座起合掌恭敬而白佛言今此法門
甚為希有能普利樂一切有情當以何名奉
持流布佛告阿難此經名為稱讚大乘功德
亦名顯說謗法業障以是名字汝當奉持時
薄伽梵說此經已阿難陀等無量聲聞德嚴
華等無數菩薩及諸天人阿素洛等一切大

衆聞佛所說皆大歡喜信受奉行

稱讚大乘功德經

妙法決定業障經

唐至相寺沙門智嚴譯

如是我聞一時佛在法界藏殿諸佛所會無
邊道場與大比丘衆菩薩摩訶薩俱時此道
場有一夫人名曰功德莊嚴開敷華合掌向